



SLUŽBENI GLASNIK OPĆINE KALESIJA

Godina: LX

Utorak 22.07.2025. godine
K A L E S I J A

Broj: 7

OPĆINSKO VIJEĆE

104

Na osnovu člana 16. Zakona o ministarskim, vladinim i drugim imenovanjima FBiH ("Sl. novine FBiH", broj 12/03, 34/03 i 65/13) i člana 42. Statuta općine Kalesija – Prečišćeni tekst ("Sl. glasnik općine Kalesija", broj 10/07, 7/08, 10/11, 3/12 i 6/13), i člana 13. Odluke o utvrđivanju standarda, kriterija i postupka imenovanja na pozicije u reguliranim organima općine Kalesija ("Sl. glasnik općine Kalesija" br. 9/15 i 3/16), Općinsko vijeće Kalesija, na sjednici održanoj dana 16.07.2025. godine, d o n o s i

ODGOVOR NA PRIGOVOR KANDIDATA HAZIMA JUSUFOVIĆA

Prigovor se odbija kao **neosnovan**.

OBRAZLOŽENJE

Kandidat za mjesto predsjednika Upravnog odbora JU Centar za socijalni rad Kalesija Hazim Jusufović dana 07.07.2025. godine podnio je prigovor na Odluku o imenovanju predsjednika i članova upravnog odbora JU Centar za socijalni rad Kalesija. Navedena Odluka je donesena na sjednici općinskog vijeća održanoj dana 03.07.2025. godine.

Podnosilac prigovora osporava navedenu Odluku iz sljedećih razloga:

- Bitnih povreda odredaba Zakona o ministarskim i drugim imenovanjima u reguliranim organima,
- Bitnih povreda odredaba Zakona koji regulišu osnove djelatnosti ustanova,
- Pogrešno i nepotpuno utvrđenog činjeničnog stanja i
- Pogrešne primjene materijalnog prava.

Naprijed navedeni razlozi podnosioca prigovora su paušalni, te kao takvi pravno neutemeljeni, a što proizilazi iz sljedećeg:

Navodi iz prigovora vezani da se imalo saznanja prije raspisanog oglasa ko će biti izabran i imenovan po navodno raspoređenom planu političkih subjekata koji imaju većinu u Općinskom vijeću nema svog utemeljenja naspram stručnosti, profesionalnog odnosa predsjednika i članova Komisije za izbor na pozicije u reguliranim organima općine Kalesija koja je provela postupak po raspisanom i objavljenom javnom oglasu. Odgovorni javni službenik – Općinsko vijeće smatra da je Komisija provela postupak javnog oglasa u skladu sa svim zakonskim propisima.

Istaknuti prigovor u dijelu koji se odnosi da prijavljeni kandidat Dukić Elvedin ne ispunjava uvjete je neosnovan, a iz sljedećih razloga:

- U JU Centar za socijalni rad Kalesija radi uposlenik sa razrednom nastavom, koji se prijavio na isti javni oglas za člana Upravnog odbora iz reda stručnih radnika ustanove, dakle, iz navedenog proizilazi da se razredna nastava može smatrati i tretirati kao srodna djelatnost.
- Također, Komisija se konsultovala sa Sekretarom općinskog vijeća, koji im je naglasio da ne postoji Zakonski propis kojim je određeno šta je srodna djelatnost i ako već imaju uposlenika sa razrednom nastavom u Ustanovi, da nema smetnje da Komisija prihvati prijavu kandidata sa razrednom nastavom kao srodnom djelatnošću.

Podnosilac prigovora navodi da su prilikom obavljenog intervjua postavljena pitanja jednostavnog i prostog karaktera iz djelokruga rada upravnog odbora, a na koja pitanja imenovani je davao polovične odgovore, te pokazao

nedovoljno znanja o upravljanju i rukovođenju Ustanovom, što se vidi iz tabele sa pojedinačnim ocjenama članova Komisije, iako isti tvrdi da je bio dugogodišnji rukovodilac JU Centar za socijalni rad Kalesija.

Katalog i fond pitanja svim kandidatima je bio isti, svi kandidati su tretirani od strane Komisije na isti način, te su ocijenjeni isključivo na osnovu pokazanog znanja, a pri tom uzimajući u obzir i iskustvo na rukovodećim poslovima ili poslovima organa upravljanja, iskustvo u najsloženijim poslovima i poslovima organizacione prirode, komunikacijske i organizacijske sposobnosti, rezultate rada tokom poslovne karijere i slično.

Što se tiče navoda da je Komisija ignorisala prigovore od strane Jusufović Hazima, Komisija je istakla i potvrdila da se kandidat Hazim Jusufović pismenim prigovorom zaprimljenim dana 23.06.2025. godine, obraćao Komisiji, a koji prigovor je od strane Komisije odbačen kao preuranjen. Komisija je također, zapazila da je preuranjenim prigovorom podnositelj imao određena saznanja o aplikantima, njihovim stručnim spremama i sl., pa shodno toj činjenici s razlogom se postavlja pitanje kako je imenovani i na koji način došao do tih saznanja, a što je samo jedan od pokazatelja da se zapravo kandidat bavio nedozvoljenim i nezakinitim postupcima, te pokušavao vršiti pritisak na Komisiju.

Imajući u vidu sve naprijed navedeno, Odgovorni javni službenik je odlučio kao u dispozitivu ovog Odgovora.

Bosna i Hercegovina
Federacija Bosne i Hercegovine
TUZLANSKI KANTON
OPĆINA KALESIJA
OPĆINSKO VIJEĆE
Broj: 01-04-2-3226/25
Datum: 17.07.2025. godine

PREDSJEDAVAJUĆI
OPĆINSKOG VIJEĆA

Damir Džafić, dipl. ecc. s.r.

105

Na osnovu člana 16. Zakona o ministarskim, vladinim i drugim imenovanjima FBiH ("Sl. novine FBiH", broj 12/03, 34/03 i 65/13) i člana 42. Statuta općine Kalesija – Prečišćeni tekst ("Sl. glasnik općine Kalesija", broj 10/07, 7/08, 10/11, 3/12 i 6/13), i člana 13. Odluke o utvrđivanju standarda, kriterija i postupka imenovanja na pozicije u reguliranim organima općine Kalesija ("Sl. glasnik općine Kalesija" br. 9/15 i 3/16), Općinsko vijeće Kalesija, na sjednici održanoj dana 16.07.2025. godine, d o n o s i:

ODGOVOR NA PRIGOVOR KANDIDATA ALIJE DŽAFIĆA

Prigovor se odbija kao **neosnovan**.

OBRAZLOŽENJE

Kandidat za mjesto člana iz reda stručnih radnika upravnog odbora JU BKC "Alija Izetbegović" Kalesija Alije Džafića dana 09.07.2025. godine podnio je prigovor na Odluku o imenovanju predsjednika i članova upravnog odbora JU BKC "Alija Izetbegović" Kalesija. Navedena Odluka je donesena na sjednici općinskog vijeća održanoj dana 03.07.2025. godine.

Svi navedeni prigovori podnositelja prigovora su paušalni i pravno neutemeljeni.

Općinsko vijeće (odgovorni javni službenik) smatra da je Komisija za izbor na pozicije u reguliranim organima općine Kalesija kompletnu proceduru izbora izvršila u skladu sa svim Zakonskim propisima, što je Općinsko vijeće potvrdilo donošenjem konačne Odluke o imenovanju predsjednika i članova Upravnog odbora JU BKC "Alija Izetbegović" Kalesija, usvojene na sjednici dana 03.07.2025. godine.

Odgovorni javni službenik osigurava da se sva javna imenovanja obavljaju na zakonit način i u skladu sa svim važećim pravilima, propisima i zakonima.

Općinsko vijeće je prilikom donošenja Odluke o imenovanju predsjednika i članova Upravnog odbora JU BKC "Alija Izetbegović" Kalesija bilo upoznato sa kompletnom provedenom procedurom izbora kandidata, kao i kompletnom dokumentacijom koja je dostavljena od strane Komisije i zapisnikom sa uvida u dokumentaciju kandidata Alije Džafića.

Podnosilac prigovora nije legitimisan da pobija Odluku o imenovanje predsjednika i članova Upravnog odbora JU BKC "Alija Izetbegović" Kalesija, u dijelu koji se odnosi na imenovanje predsjednika, iz razloga što je kandidat Alija Džafić aplicirao na mjesto člana upravnog odbora JU BKC "Alija Izetbegović" Kalesija iz reda stručnih radnika, a ne na mjesto predsjednika istog upravnog odbora.

Također, Komisija se konsultovala sa Sekretarom općinskog vijeća, koji im je naglasio da ne postoji Zakonski propis kojim je određeno šta je srodna djelatnost.

Uopćeni su i nekonkretizovani navodi iz prigovora, a vezani za pojedinačne ocjene kandidata od strane svakog člana Komisije. Naime, Komisija je postupila u skladu sa zakonskim propisima, te je svaki kandidat ocijenjen posebno od strane svih članova Komisije, pojedinačnim ocjenama, a nakon čega se dobije ukupni broj bodova za svakog kandidata, a što svakako proizilazi iz materijalne dokumentacije dostavljene ovom Općinskom vijeću (tabela bodovanja kandidata).

Izjave o sukobu interesa kandidata su uredno potpisane i nalaze se u spisu predmeta, a kandidat nije osporio autentičnost svog potpisa na datoj Izjavi.

Svi kandidati su bili upoznati o svojim pravima na prigovor i kroz sami tekst Javnog oglasa.

Komisija je nakon provedenog postupka intervjua sačinila zapisnik koji je usvojen i potpisan od strane svih članova Komisije, te je isti dostavljen Općinskom vijeću. Niti jedan drugi oblik zapisnika nije usvojen od strane Komisije, a koji se tiče intervjua.

U pogledu navoda koji se odnose na dodatne kriterije, svi kandidati su tretirani od strane Komisije na isti način, te su ocijenjeni isključivo na osnovu pokazanog znanja, a pri tom uzimajući u obzir i iskustvo na rukovodećim poslovima ili poslovima organa upravljanja, iskustvo u najsloženijim poslovima i poslovima organizacione prirode, komunikacijske i organizacijske sposobnosti, rezultate rada tokom poslovne karijere i slično.

Također, Općinsko vijeće smatra neosnovanim navode podnosioca prigovora koji se odnose na izbor kandidata koji su rangirani kao sljedeći na listi, obzirom da je javnim pozivom jasno navedeno da su kandidati dužni u prijavnim obrascu naznačiti na koju poziciju se prijavljuju. Kandidat Alija Džafić se nije prijavio na poziciju člana iz reda osnivača, već na poziciju člana iz reda stručnih radnika, te u skladu s tim nije se nalazio na rang listi za poziciju člana iz reda osnivača, te kao takav nije mogao biti ni izabran na tu poziciju. Općinskom vijeću, prilikom razmatranja Odluke o imenovanje predsjednika i članova Upravnog odbora JU BKC "Alija Izetbegović" Kalesija, nije ukazana niti jedna neregularnost u postupku provođenja javnog oglasa, od strane Sekretara općinskog vijeća, niti bilo koje druge instance osim vijećnika iz opozicije.

Na kraju ističemo da je Općinsko vijeće imalo u vidu i ostale navode iznijete u prigovoru, ali ih posebno neće obrazlagati iz razloga što smatra da su irelevantni i da neće uticati na drugačiju odluku općinskog vijeća.

Bosna i Hercegovina

Federacija Bosne i Hercegovine

TUZLANSKI KANTON

OPĆINA KALESIJA

OPĆINSKO VIJEĆE

Broj: 01-04-2-3227/25

Datum:17.07.2025. godine

PREDSJEDAVAJUĆI

OPĆINSKOG VIJEĆA

Damir Džafić, dipl. ecc. s.r.

106

Na osnovu člana 4. Zakona o ministarskim, vladinim i drugim imenovanjima ("Službene novine Federacije BiH" broj: 12/03, 34/03 i 65/13), člana 13. Zakon o principima lokalne samouprave u Federaciji Bosne i Hercegovine („Službene novine u Federaciji BiH“ broj 49/06 i 51/09) i člana 42. Statuta općine Kalesija - prečišćeni tekst ("Službeni glasnik Općine Kalesija" broj: 10/07, 7/08, 10/11, 3/12 i 6/13), Općinsko vijeće, na sjednici održanoj dana 16.07.2025. godine, d o n o s i

ODLUKU

o privremenom imenovanju člana Upravnog odbora Javne ustanove Bosanski kulturni centar "Alija Izetbegović" Kalesija

Član 1.

Za člana Upravnog odbora Javne ustanove Bosanski kulturni centar "Alija Izetbegović" Kalesija - iz reda osnivača imenuje se Nedim Selimović iz Kikača.

Član 2.

Član Upravnog odbora Javne ustanove Bosanski kulturni centar "Alija Izetbegović" Kalesija iz člana 1.ove Odluke imenuje se na period do okončanja konkursne procedure, a najviše tri mjeseca.

Član 3.

Ova Odluka stupa na snagu danom objavljivanja u "Službenom glasniku Općine Kalesija".

Bosna i Hercegovina
Federacija Bosne i Hercegovine
TUZLANSKI KANTON
OPĆINA KALESIJA
OPĆINSKO VIJEĆE
Broj: 01-04-2-3224/25
Datum:17.07.2025. godine

PREDSJEDAVAJUĆI
OPĆINSKOG VIJEĆA

Damir Džafić, dipl. ecc. s.r.

107

Na osnovu člana 13. Zakona o principima lokalne samouprave u FBiH ("Sl.novine FBiH", broj 49/06 i 51/09), člana 2. stav 1. tačka 1.6, člana 6. stav 1. i člana 8. stav 1. Zakona o ministarskim, vladinim i drugim imenovanjima FBiH ("Sl.novine FbiH", broj 12/03, 34/03 i 65/13) i člana 42. Statuta općine Kalesija – Prečišćeni tekst ("Sl. glasnik općine Kalesija", broj 10/07, 7/08, 10/11, 3/12 i 6/13), i člana 7. Odluke o utvrđivanju standarda, kriterija i postupka imenovanja na pozicije u reguliranim organima općine Kalesija ("Sl. glasnik općine Kalesija" br. 9/15 i 3/16), Općinsko vijeće Kalesija, na sjednici održanoj dana 16.07.2025. godine, d o n o s i

ODLUKU

o raspisivanju Javnog oglasa za imenovanje člana Upravnog odbora JU BKC "Alija Izetbegović" Kalesija

Član 1.

Raspisuje se Javni oglas za imenovanje člana iz reda osnivača Upravnog odbora JU BKC "Alija Izetbegović" Kalesija.

Član 2.

Tekst Javnog oglasa za imenovanje člana iz reda osnivača Upravnog odbora JU BKC "Alija Izetbegović" Kalesija će sačiniti i postupak javnog oglašavanja provesti Komisija za izbor na pozicije u reguliranim organima općine Kalesija (u daljem tekstu "Konkursna komisija"), u skladu sa članom 7. Odluke o utvrđivanju standarda, kriterija i postupka imenovanja na pozicije u reguliranim organima općine Kalesija ("Sl. glasnik općine Kalesija", broj 9/15 i 3/16).

Javni oglas za imenovanje člana Upravnog odbora JU BKC "Alija Izetbegović" Kalesija će se objaviti u "Službenim novinama FBiH" i jednom sredstvu javnog informisanja koji izlazi na području BiH i isti ostaje otvoren 15 (petnaest) dana od dana objavljivanja.

Član 3.

Nakon provedene procedure javnog oglašavanja Konkursna komisija će izvršiti pregled prijave kandidata da utvrdi njihovu formalnu ispravnost, izvršiti klasifikaciju kandidata na one koji ispunjavaju uslove tražene javnim oglasom i one koji ne ispunjavaju te uslove, pozvati sve kandidate koji ispunjavaju uslove tražene javnim oglasom na intervju, obaviti intervju sa kandidatima koji ispunjavaju uslove javnog oglasa prema prethodno utvrđenim kriterijumima, sačiniti rang listu sa redoslijedom uspješnih kandidata, utvrditi prijedloge Odluka o imenovanju člana iz reda osnivača Upravnog odbora JU BKC "Alija Izetbegović" Kalesija i dostaviti Općinskom vijeću na odlučivanje.

Član 4.

Ova Odluka stupa na snagu danom objavljivanja u "Službenom glasniku Općine Kalesija".

Bosna i Hercegovina
Federacija Bosne i Hercegovine
TUZLANSKI KANTON
OPĆINA KALESIJA
OPĆINSKO VIJEĆE
Broj: 01-04-2-3225/25
Datum: 17.07.2025. godine

PREDSJEDAVAJUĆI
OPĆINSKOG VIJEĆA

Damir Džafić, dipl. ecc. s.r.

108

Na osnovu člana 8. Zakona o principima lokalne samouprave u Federaciji BiH („Službene novine Federacije BiH“, broj:49/06 i 51/09), te člana 19. i člana 23. Statuta Općine Kalesija („Službeni glasnik Općine Kalesija“, broj 10/07, 07/08, 10/11, 3/12 i 6/13), Općinsko vijeće na vanrednoj sjednici održanoj 16.07.2025. godine, donosi

P R A V I L N I K

o utvrđivanju uslova, kriterija i postupka odobravanja subvencija za pružanje usluga redovnog autobusnog linijskog prevoza putnika na području općine Kalesija

**Član 1.
(Predmet)**

- (1) Ovim Pravilnikom utvrđuju se uslovi, kriteriji i postupak odobravanja subvencija (u daljem dijelu teksta: finansijska pomoć) za pružanje usluga redovnog autobusnog linijskog prevoza putnika na području Općine Kalesija za period od dana potpisivanja Ugovora do kraja tekuće godine. Također određuju se korisnici, namjena i postupak dodjele navedene finansijske pomoći, te nadzor i način izvještavanja.
- (2) Finansijska pomoć iz stava (1) ovog člana predstavlja dodjelu finansijskih sredstava poslovnim subjektima (pravnim i fizičkim licima) iz sektora javnog cestovnog prijevoza putnika koji imaju registrovane redove vožnje za javni linijski prijevoz putnika na općinskim autobusnim linijama na području Općine Kalesija za tekuću godinu.

**Član 2.
(Ciljevi dodjele finansijske pomoći)**

Zbog brojnih problema u oblasti cestovnog prijevoza putnika koji bitno utiču na poslovanje prijevoznika i dovode do poremećaja u pružanju usluga javnog cestovnog prijevoza putnika u smislu povećanja cijena karata i ukidanja određenih relacijskih linija, finansijska pomoć iz člana 1. ovog Pravilnika se dodjeljuje u cilju obezbjeđenja redovnog i urednog održavanja registrovanih redova vožnje za javni linijski prijevoz putnika na općinskim autobusnim linijama na području Općine Kalesija za tekuću godinu, kako ne bi došlo do dalje obustave održavanja i odvijanja javnog linijskog prijevoza putnika na registrovanim redovima vožnje ili pojedinim polascima na području općine Kalesija.

**Član 3.
(Finansijska sredstva)**

- (1) Finansijska sredstva za provođenje i realizaciju ovog Pravilnika biti će osigurana u Budžetu Općine Kalesija za tekuću godinu u odgovarajućem iznosu, na poziciji „Subvencioniranje prevoza na području općine Kalesija“.

- (2) Finansijska sredstva iz stava (1) ovog člana će biti uplaćena na račun korisnika finansijske pomoći koji ispunjavaju uslove i kriterije propisane ovim Pravilnikom i javnim pozivom, te imaju zaključen Ugovor sa davaocem finansijske pomoći.

Član 4.

(Uslovi za ostvarivanje finansijske pomoći)

- (1) Korisnici finansijske pomoći su poslovni subjekti (pravna i fizička lica) iz sektora javnog cestovnog prijevoza putnika koji ispunjavaju slijedeće uslove:
- da imaju poslovno sjedište/prebivalište na području Federacije BiH;
 - da obavljaju registriranu djelatnost u sektoru javnog cestovnog prijevoza putnika u Federaciji BiH;
 - da im je osnovna djelatnost javni prijevoz putnika iz slijedećih razreda po KD BiH 2010 – šifra djelatnosti 49.31 – „Gradski i prigradski kopneni prijevoz putnika“, šifra djelatnosti 49.39 – „Ostali kopneni prijevoz putnika, d.n.“, šifra djelatnosti 52.21 – „Uslužne djelatnosti u vezi sa kopnenim prijevozom;
 - da imaju izmirene poreske obaveze na osnovu direktnih i indirektnih poreza i doprinosa zaključno sa 30.06.2025.godine;
 - da imaju licencu prijevoznika za obavljanje javnog cestovnog prijevoza putnika ili važeće rješenje o kategorizaciji autobuske stanice, ako je to glavna djelatnost;
 - da imaju registrovane redove vožnje za linijski prijevoz putnika na općinskim autobusnim linijama na području općine Kalesija za tekuću godinu, u skladu sa odredbama Zakona o cestovnom prijevozu („Službene novine Federacije BiH“, broj 28/06, 02/10 i 57/20), Pravilnikom o načinu, kriterijima i postupku usklađivanja, ovjeri i registraciji redova vožnje, te sadržaju i načinu vođenja registra („Službene novine Federacije BiH“, broj: 79/13,91/14, 98/14 i 84/15),

te drugim važećim propisima kojima je regulisan prijevoz u unutrašnjem cestovnom prijevozu.

- (2) Korisnik finansijske pomoći može ostvariti finansijsku pomoć samo za period u kojem kumulativno ispunjava sve uslove iz ovog Pravilnika.

Član 5.

(Neprihvatljivi korisnici finansijske pomoći)

Neprihvatljivim korisnicima finansijske pomoći smatraju se:

- korisnici koji su u stečaju ili nad kojima je pokrenut postupak stečaja ili likvidacije;
- korisnici kojima je upućen zahtjev, odnosno nalog za povrat dodijeljenih budžetskih sredstava iz prethodnog perioda, a koji do dana podnošenja prijave nije realiziran;
- korisnici koji imaju dospjele, a neizmirene obaveze po osnovu doprinosa, direktnih i indirektnih poreza, zaključno sa 30.06.2025.godinu, a za koje nisu zaključeni sporazumi o obročnom plaćanju duga i/ili koji uredno ne izmiruju dospjele obaveze po zaključenom sporazumu;
- korisnici čiji su glavni računi na koje im se finansijska pomoć isplaćuje na dan podnošenja prijave blokirani radi provođenja izvršenja na novčanim sredstvima.

Član 6.

(Kriteriji za dodjelu finansijske pomoći)

- (1) Finansijska pomoć korisnicima će se dodijeliti na osnovu ukupnog broja kilometara na svim registrovanim redovima vožnje za linijski prevoz putnika na općinskim autobusnim linijama na području općine Kalesija za tekuću godinu.
- (2) Korisnik ostvaruje finansijsku pomoć mjesečno u iznosu koji će biti utvrđen Javnim pozivom u zavisnosti od raspoloživih sredstava u Budžetu Općine Kalesija i to po kilometru za svaki registrovani red vožnje za linijski prevoz putnika na općinskim autobusnim linijama na području općine Kalesija za tekuću godinu.

Član 7. (Namjena finansijske pomoći)

Sredstva finansijske pomoći mogu se koristiti isključivo za plaćanje tekućih troškova poslovanja za tekuću godinu.

Član 8. (Minimalni standardi dodjele finansijske pomoći)

U postupku pripreme i objavljivanja Javnog poziva za dodjelu sredstava, selekcije i ocjenjivanja prijava, rada Komisije za provođenje javnog poziva, ugovaranja dodjele finansijske pomoći, javnog objavljivanja rezultata i izvještavanja, praćenja namjenskog utroška i evaluacije učinka, Služba za komunalne poslove i civilnu zaštitu je dužna pridržavati se Smjernica o minimalnim standardima dodjele budžetskih sredstava putem transfera i subvencija u Federaciji BiH ("Službene novine Federacije BiH", broj 37/24).

Član 9. (Javni poziv)

- (1) Služba za komunalne poslove i civilnu zaštitu je dužna u roku od sedam dana od dana stupanja na snagu ovog Pravilnika, objaviti Javni poziv za podnošenje prijava za dodjelu finansijske pomoći korisnicima.
- (2) Javni poziv će biti objavljen na Internet stranici i oglasnoj ploči Općine Kalesija.
- (3) Javni poziv ostaje otvoren 15 dana od dana objavljivanja.
- (4) Javnim pozivom će se definisati slijedeće:
 - naziv davaoca finansijske pomoći;
 - ukupan iznos raspoloživih sredstava za dodjelu finansijske pomoći;
 - vrijeme trajanja javnog poziva, koje ne može biti kraće od 15 dana;
 - namjena dodjele sredstava finansijske pomoći;
 - način prijavljivanja za dodjelu finansijske pomoći;
 - uslovi i kriteriji za dodjelu finansijske pomoći;
 - potrebna dokumentacija koja se prilaže uz prijavu za dodjelu finansijske pomoći.

Član 10. (Komisija za provođenje javnog poziva i postupka dodjele sredstava)

- (1) Komisiju za provođenje Javnog poziva i postupka dodjele sredstava (u daljem dijelu teksta: Komisija), imenuje rukovodilac organa davaoca finansijske pomoći

- Općinski načelnik, donošenjem akta o imenovanju članova Komisije.

(2) Aktom o imenovanju se preciziraju:

- pravni osnov za formiranje Komisije;
- sastav Komisije;
- zadaci predsjednika, članova i sekretara;
- način izvještavanja;
- odgovornost;
- odredbe koje se tiču sukoba interesa;
- izjava o nepristrasnosti i povjerljivosti.

(3) Komisija treba imati neparan broj članova, a davalac budžetskih sredstava aktom o imenovanju osigurava zamjenu člana Komisije na adekvatan način.

(4) Članovi Komisije su lica koja posjeduju određena znanja i iskustva iz oblasti koja je predmet javnog poziva. Najmanje jedan član Komisije treba da posjeduje znanje i iskustvo iz oblasti finansija.

(5) Odredbe sukoba interesa najmanje uključuju da član komisije:

- nije lično/ili članovi njegove porodice (bračni ili vanbračni drug, dijete ili roditelj) nisu zaposlenici, članovi, članovi upravnog tijela ili rukovodioci kod podnosioca prijave;
- nije povezan na bilo koji način sa podnosiocem prijave ni kod drugih lica (partnerski odnos);
- nema materijalni ili nematerijalni interes u odnosu na javni interes i to u slučajevima porodične povezanosti, ekonomskih interesa ili drugog zajedničkog interesa;

(6) Izjavu o nepristrasnosti i povjerljivosti potpisuju svi članovi Komisije. Izjava o nepristrasnosti i povjerljivosti treba da sadrži najmanje izjavu člana Komisije:

- da se član Komisije i njegovi srodnici ne nalaze u sukobu interesa;
- da nema ličnih interesa kojima može uticati na nepristrasnost rada Komisije čiji je član;
- da će u obavljanju dužnosti na koju se imenuje postupati časno, pošteno, savjesno, odgovorno i nepristrasno;
- čuvati povjerljivost podataka i informacija u postupku dodjele finansijske pomoći i
- da će čuvati vlastitu vjerodostojnost i dostojanstvo dužnosti koja mu je povjerena od strane davaoca budžetskih sredstava.

- (7) Zadatak Komisije je da prati tok javnog objavljivanja i provođenja poziva, evidentira sve prijave, izvrši ocjenu formalno – pravnog ispunavanja uslova i kriterija, utvrdi listu korisnika finansijske pomoći sa iznosom dodijeljenih sredstava, te podnese Izvještaj o radu Općinskom načelniku.

Član 11.

(Potrebna dokumentacija za prijavu po Javnom pozivu)

- (1) Uz popunjenu i ovjerenu prijavu za dodjelu finansijske pomoći zainteresirana pravna i fizička lica su dužna priložiti i sljedeću dokumentaciju (original ili ovjerena fotokopija):
- aktuelni izvod iz sudskog registra, ne stariji od 30 dana od dana objavljivanja javnog poziva (pravno lice);
 - rješenje nadležne općinske službe o obavljanju obrta (fizičko lice);
 - uvjerenje o poreznoj registraciji (ID broj);
 - izjava ovlaštene osobe za zastupanje pravnog/fizičkog lica da podnosiocu prijave nije upućen zahtjev, odnosno nalog za povrat dodijeljenih budžetskih sredstava iz prethodnog perioda, a koji do dana podnošenja prijave nije realiziran (ovjerena od strane nadležnih organa uprave ili notara);
 - izjava ovlaštene osobe za zastupanje pravnog lica da podnosilac prijave nije pod stečajem i da nije pokrenut postupak stečaja ili likvidacije (ovjerena od strane nadležnih organa uprave ili notara);
 - potvrda banke da glavni računi na dan izdavanja potvrde nisu blokirani radi provedbe izvršenja na novčanim sredstvima;
 - licenca prijevoznika za obavljanje javnog prevoza putnika;
 - spisak registrovanih redova vožnje ovjeren kod nadležnog organa za ovjeru dokumenata koji sadrži popis svih registrovanih redova vožnje, naziva linija i kooperanata sa kojim iste održava, broj polazaka i povrataka razvrstanih po rangu linije i organu koji je izvršio registraciju reda vožnje, osim međunarodnih redova vožnje;
 - uvjerenje o izmirenim obavezama na osnovu direktnih i indirektnih poreza i doprinosa na plaću sa danom 30.06.2025.godine;
 - obrazac sa ponudom cijena.

- (2) Ovjerena i potpisana prijava sa dokumentacijom za postupak dodjele finansijske pomoći dostavlja se u zatvorenoj i zapečaćenoj koverti na kojoj je obavezno naznačeno: "**POSTUPAK DODJELE FINANSIJSKE POMOĆI – OTVARA KOMISIJA**", lično na protokol Općine Kalesija ili putem pošte na adresu: Ulica Patriotske lige 15, 75265 Kalesija.

Član 12.

(Rješenje o dodjeli finansijske pomoći)

- (1) Na osnovu provedenog Javnog poziva, uslova i kriterija propisanih ovim Pravilnikom, te utvrđene liste korisnika finansijske pomoći sa iznosom dodijeljenih sredstava, Služba za komunalne poslove i civilnu zaštitu, na prijedlog Komisije, donosi Rješenje o dodjeli finansijske pomoći.
- (2) Protiv Rješenja iz stava (1) ovog člana stranka ima pravo žalbe. Žalba se podnosi pismeno Komisiji za drugostepeno upravno rješavanje, putem Službe za komunalne poslove i civilnu zaštitu u roku od osam (8) dana od dana dostavljanja Rješenja.

Član 13.

(Ugovor o dodjeli finansijske pomoći i Izvještaj o utrošku dodijeljenih sredstava finansijske pomoći)

- (1) Općina Kalesija će sa korisnicima finansijske pomoći zaključiti Ugovore o dodjeli finansijske pomoći kojima se uređuju međusobna prava i obaveze, a najkasnije petnaest (15) dana od dana pravosnažnosti Rješenja o dodjeli finansijske pomoći.
- (2) Ugovor iz stava (1) ovog člana obavezno sadrži i slijedeće elemente:
- ukupan iznos i namjenu sredstava koja se dodjeljuju;
 - period za koji se dodjeljuje finansijska pomoć;
 - dinamiku i načine doznačavanja sredstava;
 - obavezu korisnika pomoći da će po zahtjevu Službe za komunalne poslove i civilnu zaštitu u roku od petnaest (15) dana od dana prijema zahtjeva izvršiti povrat

nezakonito, odnosno nenamjenski utrošenih sredstava ili cjelokupan iznos dodijeljene finansijske pomoći u slučaju propuštanja korisnika finansijske pomoći da ispuni obaveze iz stava (3) ovog člana;

- obavezu korisnika pomoći o izdavanju vlastite mjenice "bez protesta" u svrhu osiguranja povrata neutrošenih ili nezakonito, odnosno nenamjenski utrošenih sredstava u skladu sa stavom (4) ovog člana ili povrata cjelokupnog iznosa dodijeljene finansijske pomoći u slučaju propuštanja korisnika finansijske pomoći da ispuni obavezu iz stava (3) ovog člana.

- (3) Korisnici finansijske pomoći dužni su dostaviti Službi za komunalne poslove i civilnu zaštitu Izvještaj o zakonitom i namjenskom utrošku dodijeljenih sredstava finansijske pomoći u skladu sa odredbama Ugovora iz stava (1) ovog člana najkasnije do kraja slijedeće kalendarske godine.
- (4) Neutrošena sredstva i/ili nezakonito, odnosno nenamjenski utrošena sredstva korisnik finansijske pomoći je obavezan vratiti u Budžet Općine Kalesija u roku od petnaest (15) dana od dana upućivanja zahtjeva za povrat sredstava od strane Službe za komunalne poslove i civilnu zaštitu.
- (5) Služba nadležna za finansije davaoca finansijske pomoći dužna je osigurati detaljno vođenje evidencije o dodjeli finansijske pomoći u skladu sa potpisanim Ugovorom. Takva evidencija mora sadržavati neophodne informacije kako bi se utvrdilo da su ispunjeni svi potrebni uslovi za dodjelu finansijske pomoći, namjenski utrošak sredstava i evaluaciju učinka dodjele finansijske pomoći, te na osnovu toga na adekvatan način do kraja slijedeće kalendarske godine izvijestio Općinski načelnik.

Član 14. (Nadzor)

Služba za komunalne poslove i civilnu zaštitu nadzire zakonito i namjensko korištenje dodijeljene finansijske pomoći na osnovu izvještaja koje su dužni dostaviti svi korisnici finansiranja u rokovima propisanim ugovorom sa odgovarajućom dokaznom dokumentacijom i podacima pribavljenim iz nadležne službe za finansije davaoca finansijske pomoći.

Član 15. (Stupanje na snagu)

Ovaj Pravilnik stupa na snagu danom objavljivanja u "Službenom glasniku Općine Kalesija".

Bosna i Hercegovina

Federacija Bosne i Hercegovine

TUZLANSKI KANTON

OPĆINA KALESIJA

OPĆINSKO VIJEĆE

Broj: 01-04-2369/25

Datum: 17.07.2025. godine

PREDSJEDAVAJUĆI

OPĆINSKOG VIJEĆA

Damir Džafić, dipl. ecc. s.r.

Sadržaj

Broj akta	OPĆINSKO VIJEĆE	Strana
104	Odgovor na prigovor kandidata Hazima Jusufovića.....	253
105	Odgovor na prigovor kandidata Alije Džafića.....	254
106	Odluka i privremenom imenovanju člana Upravnog odbora Javne ustanove BKC „Alija Izetbegović“ Kalesija.....	256
107	Odluka o raspisivanju Javnog oglasa za imenovanje člana Upravnog odbora JU BKC „Alija Izetbegović“ Kalesija.....	256
108	Pravilnik o utvrđivanju uslova, kriterija i posrupka odobravanja subvencija za pružanje usluga redovnog autobusnog linijskog prevoza putnika na području općine Kalesija.....	257